

LA USC DI LADINS – VENERDI' 1 MARZO 2019

*** *L cianton de l'Union* ***

Union di Ladins de Fascia

Strada Dolomites 22, Sèn Jan, Vich
Telefon e fax 0462 764545 e-mail: union@ladinsdefascia.it
oraries al publich: dal lunesc al vender da les 8.30 a les 12.30 e da les 14.00 a les 18.00



Radunanza generèla de l'Union di Ladins

Doman, sabela ai 2 de mèrz da les 16.00, te sala grana de l'Istitut ladin. Vegn prejentà ence l nef Almanach 2018

Sèn Jan - Ence per l'Union di Ladins de Fascia l'è vegnù ora de fèr n bilanz de l'an passà e de trèr la somes de l'ativitèdes e la scomenzadives portèdes a compiment.

La l farà te sia radunanza generèla en program doman, sabela ai 2 de mèrz, da les 16.00 te sala grana de l'Istitut ladin a Sèn Jan. E la l farà ence de gra a la gustegola neva edizion de l'Almanach, ruèda al numer 7, che desche ogne an la porta dant i fac maores sozedui anter noscia comunanza, se sà ben con n eie struçà, trèr l'apise pizochent de Manuel Riz che à metù dant 12 patofies dalbon gustegoles che dèsc n chèder da color e da ironia de chel che l'è stat del 2018.


Apede a la patofies de Manuel

sun chesta neva edizion l'è desche semper la piroles e vèlch mizacola de storia de doudese persones che à lascià sia pedies te la Ladinia.

Chest an l'Union di Ladins à domanà la colaborazion de doi scoles de Fascia per meter ensema l'Almanach e l'fèr amò più rich. L'argoment cernù dal Consei l'è stat chel di strumenc musical e coscita la scola de musega "Il Pentagramma", con sie president Stefano Lazzar, à metù ensema la descrizion de 12 strumenc e i studenc de la IV clas del Liceo Artistich Èrts Feguratives, con sia insegnanta Lara Steffe, ge à fat i dessegnes aldò. La grafica é de Stephanie Ghetta e l resultat l'è dut da descoriger te na revista preziosa e fascinosa. L'Almanach ge vegn sport a duc i aboné de La Use di Ladins e ai sozi de l'Union en regola

col paament. Apede a la prejentazion de l'Almanach, l president de l'Union di Ladins de Fascia Fernando Brunel portarà dant ence mingol de bilanz de la sociazion fascèna e de la scomenzadives che la fèsc per l ben de la cultura, del lengaz e de la tradizions. No menciàrà la riflescions su la situazion del popul ladin, su la coscienza de esser mendranza, sul raport e l leam coi etres ladins, sul davegnir de noscia comunanzes. Donca n moment emportant per la sociazion ma ence per duc i militanc che ge stèsc apede e fèsc sentir sie sostegn.

La radunanza sarà viventèda da la musega di gropes de la scola Il Pentagramma e tinultima se serarà sù con n moment convivial duc ensema. Ve speton. (nici)



La soracuerta de la neva edizion de l'Almanach.